



Broj: 02-05-18285-1/07  
Sarajevo, 05.07.2007. godine

Na osnovu čl. 22. i 24. stav 4. Zakona o Vladi Kantona Sarajevo ("Službene novine Kantona Sarajevo", broj 24/03 - Prečišćeni tekst), Vlada Kantona Sarajevo donijela je, na **18.** sjednici održanoj **05.07.2007.** godine, sljedeći

## ZAKLJUČAK

1. Utvrđuje se Nacrt zakona o nabavljanju, držanju i nošenju oružja i municije.
2. Predlaže se Skupštini Kantona Sarajevo da, u skladu sa Poslovníkom Skupštine Kantona Sarajevo, utvrdi Nacrt zakona iz tačke 1. ovog Zaključka, te ga uputi na javnu raspravu.

**P R E M I J E R**

**Samir Silajdžić, dipl. pravnik**

Dostaviti:

1. Predsjedavajući Skupštine Kantona Sarajevo
2. Premijer Vlade Kantona Sarajevo
3. Skupština Kantona Sarajevo
4. Ministarstvo unutrašnjih poslova
5. Evidencija
6. A r h i v a



e-mail: [premijer@ks.gov.ba](mailto:premijer@ks.gov.ba), [www.ks.gov.ba](http://www.ks.gov.ba)  
Tel: + 387 (0) 33 562-068, + 387 (0) 33 562-070  
Fax: + 387 (0) 33 562-211  
Sarajevo, Reisa Džemaludina Čauševića 1



Na osnovu člana 18. tačka b) Ustava Kantona Sarajevo („Službene novine Kantona Sarajevo“, br. 1/96, 2/96-Ispravka, 3/96-Ispravka, 16/97, 14/00, 4/01 i 28/04), Skupština Kantona Sarajevo, na sjednici od \_\_\_\_\_2007. godine, d o n i j e l a j e

NACRT

## Z A K O N

### O NABAVLJANJU, DRŽANJU I NOŠENJU ORUŽJA I MUNICIJE

#### I - UVODNI DIO

##### Član 1. (Predmet)

Ovim zakonom se utvrđuju uslovi za nabavljanje, držanje i nošenje oružja i municije, oduzimanje oružja i municije, promet oružja i municije, popravlanje i prepravljanje oružja na području Kantona Sarajevo.

##### Član 2. (Primjena)

- (1) Oružje i municija se može nabavljati, držati i nositi samo po odredbama ovog zakona.
- (2) Odredbe ovog zakona u pogledu nabavljanja, držanja i nošenja oružja i municije odnose se i na strane državljane i lica bez državljanstva koji imaju odobrenje za stalno nastanjenje na teritoriji Bosne i Hercegovine.

##### Član 3. (Izuzeci u primjeni)

Odredbe ovog zakona ne odnose se na pripadnike oružanih snaga, na policijske službenike, službenike sudske policije, pripadnike straže kazneno-popravnih ustanova, zaposlenike Obavještajno-sigurnosne agencije Bosne i Hercegovine, kada drže i nose oružje i municiju po propisima svoje službe.

##### Član 4. (Oružje)

- (1) Kao oružje u smislu ovog zakona smatra se:
  - a) vatreno oružje,
  - b) vazdušno oružje,
  - c) gasno oružje,
  - d) oružje za signalizaciju,
  - e) rasprskavajuće oružje i
  - f) hladno oružje.
- (2) Vatreno oružje su sve vrste pušaka, pištolja i revolvera, kao i sve vrste naprava koje pod pritiskom barutnih gasova izbacuju kroz cijev zrno, kuglu, sačmu ili druge projekte. Vatreno oružje je kratko ili dugo vatreno oružje koje može biti sa repetirajućim mehanizmom, poluautomatsko ili automatsko.
- (3) Vazdušno oružje su sve vrste pušaka, pištolja, revolvera i druge naprave koje pod pritiskom vazduha izbacuju kroz cijev zrno, kuglu ili druge projekte.

- (4) Gasno oružje i oružje za signalizaciju su puške, pištolji i revolveri i druge naprave koje pod pritiskom gasova raspršuju nadražljive tvari, odnosno ispaljuju punjenje namijenjeno isključivo izazivanju glasnog pucanja ili ispaljivanju svijetleće signalne zvjezdice.
- (5) Rasprskavajuće oružje su sve vrste bombi, mina, granata i drugih naprava opremljenih sa eksplozivnom materijom ili detonatorom (težina, udar, potez, trenje, hemijska reakcija, električna energija i sl.) kod kojih dolazi do oslobađanja energije i njihovog rasprskavanja.
- (6) Hladno oružje su bodeži, kame, mačevi, sablje, bajoneti i skakavci čije se sječivo nalazi pod pritiskom sabijene opruge, a iz drške iskaču pritiskom na dugme ili polugu ili metalne zvjezdice za bacanje, bez obzira na dužinu oštrice, bokseri, te druga oružja sa skrivenim oštricama. Hladnim oružjem smatraju se i predmeti pogodni za nanošenje povreda kada se nose na javnim mjestima.

#### Član 5.

##### (Dijelovi za vatreno i vazdušno oružje)

Kao dijelovi za vatreno i vazdušno oružje, u smislu ovog zakona, smatraju se cijevi za puške i pištolje, ulošci – adapteri sa olučenim cijevima za puške, sa neolučenim cijevima i zatvarači, kao i drugi dijelovi koji su označeni fabričkim brojem.

#### Član 6.

##### (Municija)

Pod municijom u smislu ovog zakona, podrazumijevaju se meci, patrone, čahure sa upaljačem, upaljači, zrna, sačma, dijabole i barut.

#### Član 7.

##### (Značenje izraza)

Pojedini izrazi upotrijebljeni u ovom zakonu imaju slijedeća značenja:

- a) lovačko oružje čine lovačke puške, puške raznih kalibara sa olučenim i neolučenim cijevima, kojima nije zabranjeno loviti divljač,
- b) sportsko oružje čine pištolji i revolveri velikog kalibra podešeni za sportske svrhe, malokalibarske puške i malokalibarski pištolji, kalibra 5,6 mm, sa ivičnim paljenjem i sa olučenim i neolučenim cijevima, vazdušne puške i vazdušni pištolji, lukovi, samostreli i druga sportska oružja,
- c) trofejno oružje je vatreno, vazdušno i hladno oružje koje se čuva kao uspomena ranijeg perioda historije Bosne i Hercegovine, ili za njegovog vlasnika predstavlja ličnu ili porodičnu uspomenu, a koje je od strane ovlaštene organizacije ili ovlaštenog pojedinca onesposobljeno za upotrebu, kao i sablje, mačevi i sl.,
- d) staro oružje su duge i kratke puške, kubure i druge vrste oružja za koje se više ne proizvodi municija, koje imaju historijsku ili umjetničku vrijednost ili služi za umjetničke, kulturne i druge slične priredbe, ili čini sastavni dio narodne nošnje i koje je od strane ovlaštene organizacije ili ovlaštenog pojedinca onesposobljeno za upotrebu, kao i sablje, mačevi i sl.,
- e) oružje za uspavlivanje životinja je oružje koje se upotrebljava u svrhu držanja, čuvanja, zaštite životinja, naučnog istraživanja i prikupljanja stručnih podataka,
- f) automatsko oružje je oružje kod kojeg je jednokratnim pritiskom na obarač moguće ispaliti više metaka,
- g) poluautomatsko oružje je oružje koje je nakon ispaljivanja svakog metka ponovo spremno za ispaljivanje i kod kojeg je iz cijevi jednokratnim pritiskom obarača moguće ispaljivati jedan metak,
- h) kratko vatreno oružje je oružje čija cijev nije duža od 30 cm, a ukupna dužina ne prelazi 60 cm,
- i) snajper je optički nišan za oružje i

- j) registrovano oružje je oružje za koje je izdato odobrenje za držanje oružja ili oružni list.

## II – GLAVNI DIO

### A) Nabavljanje, držanje i nošenje oružja i municije

#### Član 8.

(Odobrenje za nabavljanje oružja i municije)

- (1) Vatreno i vazdušno oružje, municija za puške sa olučenim cijevima, pištolji i revolveri mogu se nabavljati samo na osnovu odobrenja policijske uprave Ministarstva unutrašnjih poslova Kantona Sarajevo na čijem području podnosilac zahtjeva ima prebivališe, odnosno sjedište (u daljnjem tekstu: nadležna policijska uprava). Načelnik nadležne policijske uprave će formirati komisiju od tri člana koja će cijeliti opravdanost zahtjeva za dobijanje odobrenja za nabavku oružja i municije i najmanje jedanput godišnje obavještavati policijskog komesara i ministra unutrašnjih poslova Kantona Sarajevo (u daljnjem tekstu: ministar) o načinu rješavanja zahtjeva za nabavljanje oružja i municije.
- (2) Dijelovi za oružje iz stava (1) ovog člana sa označenim fabričkim brojem mogu se nabavljati na osnovu odobrenja nadležne policijske uprave i to samo za oružje za koje je izdat oružni list.
- (3) Zamijenjene tehnički ispravne dijelove vatrenog i vazdušnog oružja koji se označavaju fabričkim brojem imaoci oružja dužni su predati nadležnoj policijskoj upravi koja će o tome izdati potvrdu, a sa preuzetim dijelovima postupit će u smislu odredaba člana 38. ovog zakona.
- (4) Odobrenje za nabavljanje lovačkog oružja i municije može se izdati samo licu koje je položilo lovački ispit i član je lovačke organizacije.
- (5) Izuzetno od odredbi stava (4) ovog člana, odobrenje za nabavljanje lovačkog oružja može se izdati i licu kome je držanje i nošenje takvog oružja neophodno radi zaštite imovine u ličnoj svojini (stada, usjev i sl.) kao i streljačkim organizacijama radi upražnjavanja streljačkog sporta.
- (6) Odobrenje za nabavljanje sportskog oružja i municije može se izdati samo streljačkim organizacijama i njihovim članovima.
- (7) Odobrenje po odredbama st. (1), (2), (4), (5) i (6) ovog člana važi šest mjeseci od dana uručenja.
- (8) Oružje, kao i dijelove za oružje, može nabaviti samo lice na čije ime odobrenje glasi.
- (9) Odobrenje za nabavljanje municije može se izdati samo za oružje za koje je licu izdat oružni list, odnosno odobrenje za držanje oružja.

#### Član 9.

(Zabrana nabavljanja, držanja, nošenja, popravljanja, prepravljanja i prometa)

- (1) Zabranjeno je nabavljanje, držanje, nošenje, popravljanje i prepravljanje, ukoliko ovim zakonom nije drugačije određeno:
  - a) automatskog oružja,
  - b) dugog poluautomatskog oružja,
  - c) vatrenog oružja bez označene marke, kalibra i fabričkog broja,
  - d) oružja sa integralnim prigušivačem, prigušivača namijenjenih oružju i dijelova za prigušivače,
  - e) oružja koje je namijenjeno za izbacivanje eksplozivnih projektila,
  - f) oružja koje ima oblik predmeta druge namjene, tako da po svome vanjskom izgledu nije prepoznatljivo kao oružje,
  - g) rasprskavajućeg oružja,
  - h) gasnog oružja,

- i) hladnog oružja i
- j) municije čija je osnovna namjena probijanje oklopa, municije sa eksplozivnim, zapaljivim ili otrovnim projektilima.

(2) Zabranjen je promet oružjem i napravama iz stava (1) ovog člana.

#### Član 10.

(Nošenje predmeta podesnih za nanošenje tjelesnih povreda)

- (1) Zabranjeno je na javnim i vjerskim okupljanjima, ugostiteljskim objektima, obrazovnim ustanovama i na drugim javnim mjestima nositi predmete koji su podesni za nanošenje tjelesnih povreda.
- (2) Kada se predmeti iz stava (1) ovog člana nose na javnim i vjerskim skupovima, u ugostiteljskim objektima, obrazovnim ustanovama i na drugim javnim mjestima smatraju se hladnim oružjem.

#### Član 11.

(Oružni list)

- (1) Za držanje i nošenje oružja građanima se izdaje oružni list. Oružni list izdaje nadležna policijska uprava.
- (2) Imalac oružja dužan je, kada drži ili nosi oružje, imati uz sebe oružni list izdat za to oružje i na zahtjev policijskih službenika i drugih ovlaštenih službenih lica Ministarstva unutrašnjih poslova Kantona Sarajevo (u daljnjem tekstu: Ministarstvo) omogućiti uvid u to oružje i oružni list.
- (3) Municija za puške sa neolučenim cijevima i za vazdušno oružje može se nabavljati na osnovu oružnog lista izdatog za to oružje.
- (4) Izdavanje oružnog lista ne može se odbiti licu kome je izdato odobrenje za nabavljanje oružja, osim u slučajevima predviđenim ovim zakonom.
- (5) Na isto lovačko ili sportsko oružje mogu se izdati oružni listovi za najviše tri lica.
- (6) Oružni list izdaje se sa rokom važnosti od 10 godina.
- (7) Imalac oružja može, u roku od 60 dana od dana isteka roka iz stava (6) ovog člana, podnijeti zahtjev za produženje važnosti oružnog lista nadležnoj policijskoj upravi uz koji prilaže dokaze da je oružje ispravno, da ispunjava uvjet u pogledu zdravstvene sposobnosti za držanje i nošenje oružja, a za lovačko i streljačko oružje i dokaz da je član lovačke i streljačke organizacije. Nadležna policijska uprava utvrđuje da li imalac oružja ispunjava uslove propisane u članu 20. stav (2) tač. b), c), d) i e) ovog zakona.
- (8) Ukoliko u roku iz stava (7) ovog člana ne podnese zahtjev za produženje važnosti oružnog lista, ili ne ispuni uslove iz stava (7) ovog člana, imalac oružja je dužan nakon isteka navedenog roka oružje, municiju i oružni list predati nadležnoj policijskoj upravi, koja je u svakom slučaju, istekom propisanog roka od 60 dana, obavezna donijeti rješenje o oduzimanju oružja, municije i oružnog lista te postupiti u skladu sa članom 38. ovog zakona.
- (9) Protiv rješenja o oduzimanju iz stava (8) ovog člana može se izjaviti žalba policijskom komesaru u roku od 15 dana od dana prijema rješenja.
- (10) Obrazac i sadržaj obrasca oružnog lista, na prijedlog policijskog komesara, propisuje ministar.

#### Član 12.

(Trofejno oružje)

- (1) Za držanje trofejnog oružja potrebno je odobrenje koje izdaje nadležna policijska uprava.
- (2) Zabranjeno je nositi i upotrebljavati trofejno oružje i za ovo oružje nabavljati i držati municiju.

- (3) Nadležna policijska uprava će odbiti zahtjev za izdavanje odobrenja iz stava (1) ovog člana licu kod kojeg postoji neka od smetnji iz člana 20. ovog zakona.

### Član 13. (Staro oružje)

- (1) Staro oružje može se nabaviti, držati i nositi bez odobrenja i oružnog lista.
- (2) Fizičko lice koje se bavi sakupljanjem starog oružja mora imati odobrenje nadležne policijske uprave.
- (3) Zabranjeno je upotrebljavati staro oružje kao oružje i za njega nabavljati, spravljati i držati municiju.
- (4) Vlasnik starog oružja dužan je isto prijaviti nadležnoj policijskoj upravi.

### Član 14. (Oružje za signalizaciju i oružje za uspavljivanje životinja)

- (1) Oružje za signalizaciju se može nabaviti, držati i nositi bez odobrenja i oružnog lista.
- (2) Vlasnik oružja za signalizaciju dužan je nabavku oružja u roku od osam dana prijaviti nadležnoj policijskoj upravi koja o tome vodi odgovarajuću evidenciju.
- (3) Oružje za uspavljivanje životinja može se nabaviti, držati i nositi na osnovu odobrenja koje izdaje nadležna policijska uprava pravnim licima koja imaju registrovanu djelatnost za uzgoj, držanje, čuvanje ili zaštitu životinja.
- (4) Pravna lica iz stava (3) ovog člana, rukovanje i korištenje oružja mogu povjeriti samo punoljetnim licima koja ispunjavaju uvjete propisane članom 20. st. (2) tač. b), c), d) i e) i (3) ovog zakona.

### Član 15. (Snajper)

- (1) Fizičko lice, streljačka organizacija i organizacija koja gazduje lovištem koji nabave snajper, dužni su da to prijave nadležnoj policijskoj upravi odmah, a najkasnije u roku od 10 dana od dana nabavljanja.
- (2) Fizičko lice, streljačka organizacija i organizacija koja gazduje lovištem, dužni su prijaviti otuđenje, nestanak ili gubljenje snajpera odmah, a najkasnije u roku od 10 dana od dana otuđenja, nestanka ili gubljenja snajpera, odnosno od dana kada su saznali za otuđenje, nestanak ili gubljenje snajpera.
- (3) Nadležna policijska uprava vodi evidenciju o snajperima koje drže pojedinci, streljačke organizacije i organizacije koje gazduju lovištima.
- (4) Bliže propise o vođenju evidencije iz stava (3) ovog člana, na prijedlog policijskog komesara donosi ministar.

### Član 16. (Smrt imaoca oružja)

- (1) U slučaju smrti imaoca oružja, član njegove porodice ili drugo lice koje je s njim živjelo u zajednici dužni su da u roku od 60 dana od dana njegove smrti, a na zahtjev nadležne policijske uprave i prije isteka tog roka, predaju na čuvanje toj policijskoj upravi oružje, municiju i oružni list, odnosno dozvolu za držanje trofejnog oružja.
- (2) Fizičkom licu koje naslijedi oružje iz stava (1) ovog člana, na njegov zahtjev, nadležna policijska uprava izdat će oružni list, odnosno odobrenje za držanje trofejnog oružja, ukoliko ispunjava uslove iz člana 20. ovog zakona. Ako se oružni list, odnosno odobrenje za držanje oružja ne izda nadležna policijska uprava postupit će u skladu sa odredbama čl. 38. i 40. ovog zakona.

#### Član 17.

##### (Obaveza prijavljivanja nabavljenog oružja)

- (1) Fizička i pravna lica kojima je izdato odobrenje za nabavljanje oružja, dužna su u roku od osam dana od dana izvršene nabavke oružja podnijeti pismeni zahtjev za registraciju oružja nadležnoj policijskoj upravi radi registracije oružja i izdavanja oružnog lista, odnosno odobrenja za držanje oružja.
- (2) Fizička i pravna lica, kojima je izdato odobrenje za nabavljanje oružja, a oružje nisu nabavili u roku od šest mjeseci od dana uručenja odobrenja, dužni su vratiti odobrenje za nabavljanje oružja u roku od osam dana od dana proteka roka, nadležnoj policijskoj upravi koja je izdala odobrenje.

#### Član 18.

##### (Zamjena vatrenog oružja)

- (1) Zamjena vatrenog oružja može se izvršiti samo ako oružni listovi glase na istu vrstu vatrenog oružja.
- (2) Fizička lica koja zamijene oružje dužna su da u roku od osam dana od dana zamjene o tome obavijeste nadležnu policijsku upravu i podnesu zahtjev za izdavanje novog oružnog lista.

#### Član 19.

##### (Prenos prava svojine, korištenja i raspolaganja)

- (1) Fizička i pravna lica kojima je izdato odobrenje za držanje oružja, ne mogu prenijeti pravo svojine na vatreno i vazdušno oružje drugim licima koji nemaju odobrenje za nabavku te vrste oružja.
- (2) Vlasnik oružja koji je prenio pravo svojine na oružje dužan je odmah, a najkasnije u roku od osam dana, predati nadležnoj policijskoj upravi oružni list, odnosno odobrenje za držanje oružja i priložiti primjerak odobrenja za nabavku oružja izdatog licu odnosno navedenoj organizaciji, na koje se prenosi pravo svojine, odnosno pravo korištenja i raspolaganja na oružje.

#### Član 20.

##### (Opći i posebni uvjeti za izdavanje odobrenja za nabavljanje oružja)

- (1) Nadležna policijska uprava izdat će odobrenje za nabavljanje oružja fizičkom licu ukoliko ispunjava opće i posebne uvjete.
- (2) Opći uvjeti za izdavanje odobrenja za nabavljanje oružja su:
  - a) da je navršilo 21 godinu života, a za nabavljanje streljačkog i lovačkog oružja 18 godina života,
  - b) da ima opravdani razlog za nabavljanje oružja,
  - c) da nije osuđen za krivično djelo, osim za krivična djela protiv bezbjednosti javnog prometa,
  - d) da se protiv njega ne vodi istraga ili krivični postupak, osim za krivična djela protiv bezbjednosti javnog prometa i
  - e) da nije u posljednje dvije godine kažnjeno za prekršaj protiv javnog reda i mira, odnosno za prekršaj propisan ovim zakonom, kao i za vrijeme dok se protiv tog lica vodi postupak za takve prekršaje.
- (3) Posebni uvjeti za izdavanje odobrenja za nabavljanje oružja su:

- a) da je na zdravstvenom pregledu utvrđeno da je lice zdravstveno sposobno za držanje i nošenje oružja i
  - b) da raspolaže tehničkim znanjem za pravilno rukovanje oružjem i da poznaje propise koji se odnose na držanje i nošenje oružja.
- (4) Izuzetno, od stava (2) tačka a) ovog člana, odobrenje za nabavku ličnog oružja može se izdati licima iz člana 3. ovog zakona sa navršениh 18 godina života.

#### Član 21.

(Utvrđivanje uvjeta za izdavanje odobrenja za nabavljanje oružja)

- (1) Nadležna policijska uprava utvrdit će da li su ispunjeni uvjeti iz člana 20. stav (2) tač. a), b), c), d) i e).
- (2) Podnosioca zahtjeva koji ispunjava uvjete iz člana 20. stav (2) tač. a), b), c), d) i e) nadležna policijska uprava, ako utvrdi da nema osnova za odbijanje zahtjeva u skladu sa članom 22. stav (1), uputit će da u roku od 60 dana dostavi dokaze o ispunjavanju uvjeta iz člana 20. stav (3) tač. a) i b).
- (3) Postojanje uvjeta iz člana 20. stav (3) tačka a), dokazuje se uvjerenjem o zdravstvenoj sposobnosti koje izdaju zdravstvene organizacije koje su ovlaštene za obavljanje takvih zdravstvenih pregleda.
- (4) Postojanje uvjeta iz člana 20. stav (3) tačka b) dokazuje se:
  - a) za lovačko oružje – potvrdom o položenom lovačkom ispitu,
  - b) za sportsko oružje – potvrdom sportske streljačke organizacije i
  - c) za kratko vatreno oružje – potvrdom o osposobljenosti za pravilno rukovanje, držanje i nošenje oružja koju izdaje Komisija Ministarstva imenovana od strane ministra na prijedlog policijskog komesara, nakon provedenog testiranja.
- (5) Izuzetno, od stava (4) ovog člana, lica iz člana 3. ovog zakona, za vrijeme aktivne službe ili nakon odlaska u mirovinu, postojanje uvjeta iz stava (4) tačka c) ovog člana dokazuju ispravom o zaposlenju, odnosno o prestanku radnog odnosa zbog ispunjavanja uslova za mirovinu.
- (6) Program, način i troškove osposobljavanja za slučajeve iz stava (4) tačka c) ovog člana na prijedlog policijskog komesara donosi ministar.

#### Član 22.

(Interesi javnog reda i mira i bezbjednosti)

- (1) Nadležna policijska uprava odbit će zahtjev za izdavanje odobrenja za nabavljanje oružja ili municije ako to nalažu interesi javnog reda i mira, odnosno interesi bezbjednosti.
- (2) Interese javnog reda i mira, odnosno interese bezbjednosti iz stava (1) ovog člana, nadležna policijska uprava cijeni na osnovu okolnosti koje ukazuju da bi oružje moglo biti zloupotrebjeno, naročito uzimajući u obzir uživanje narkotičkih sredstava, češće i prekomjerno uživanje alkohola, teže poremećeni porodični odnosi, susjedski odnosi i odnosi na radnom mjestu i disciplinske povrede propisa o lovstvu ili sportskom streljaštvu.
- (3) Policijski službenik Ministarstva ovlašten je tražiti i prikupljati podatke i informacije od građana radi utvrđivanja uvjeta iz stava (2) ovog člana, o čemu sačinjava službenu zabilješku.
- (4) U izuzetnim slučajevima, u rješenju kojim se odbija zahtjev za izdavanje odobrenja za nabavljanje oružja ili municije, nadležna policijska uprava ne mora navesti razloge kojima se rukovodila za donošenje takvog rješenja.

Član 23.  
( Pravo žalbe)

Protiv rješenja policijske uprave o odbijanju zahtjeva za izdavanje odobrenja za nabavljanje oružja ili municije, podnositelj zahtjeva može podnijeti žalbu policijskom komesaru u roku od 15 dana od dana prijema rješenja.

Član 24.  
(Ograničenje u nabavljanju pištolja i revolvera)

Fizičko lice može imati najviše jedan pištolj i jedan revolver za koje mu je izdat oružni list.

Član 25.  
(Oduzimanje odobrenja)

- (1) Odobrenje za nabavljanje oružja ili municije oduzet će se ako poslije izdavanja odobrenja nastupi koji od slučajeva iz člana 20. stav (2) tač. b), c), d) i e) i stav (3) tačka a) ovog zakona.
- (2) Protiv rješenja o oduzimanju iz stava (1) ovog člana može se izjaviti žalba policijskom komesaru u roku od 15 dana od dana prijema rješenja.
- (3) Oružni list neće se izdavati ako poslije izvršene nabavke oružja nastupi koji od slučajeva iz člana 20. stav (2) tač. b), c), d) i e) i stava (3) tačka a) ovog zakona.

Član 26.  
(Postupanje sa oružjem i municijom)

- (1) S oružjem i municijom mora se postupati s naročitom pažnjom.
- (2) Naročita pažnja u postupanju s oružjem i municijom pokazuje se u njegovom pravilnom čuvanju, pravilnom, stručnom i pažljivom rukovanju, nošenju, prenošenju i držanju u ispravnom stanju.
- (3) Građani su dužni pridržavati se pravila javno istaknutih zabrana o unošenju oružja u određene prostore ili prostorije.
- (4) Fizičko lice ne smije nositi oružje kada je pod uticajem alkohola, opojnih droga ili drugih omamljujućih sredstava, odnosno u takvom stanju da nije u mogućnosti shvatiti značenje svog postupanja, odnosno vladati svojom voljom.

Član 27.  
(Čuvanje oružja i municije)

- (1) Oružje i municija moraju se čuvati tako da nisu dostupni fizičkom licu koje nije ovlašteno posjedovati ga, a naročito djeci, zaključani i odvojeni u metalnom ormaru, sefu ili sličnom spremištu koje se ne može otvoriti alatom uobičajene upotrebe.
- (2) Oružje i municija moraju se čuvati u stambenom ili drugom odgovarajućem prostoru koji se nalaze u mjestu prebivališta, odnosno sjedišta vlasnika ili korisnika oružja i municije.
- (3) Vlasnik oružja i municije koji napušta mjesto prebivališta na vrijeme duže od godinu dana, a oružje i municiju koje se prema ovom zakonu posjeduje na osnovu oružnog lista ne nosi sa sobom, dužan ga je predati na čuvanje fizičkom licu koje ima oružni list za istu vrstu oružja ili ovlaštenom trgovcu oružjem.
- (4) Vlasnik oružja i municije dužan je u slučaju iz stava (3) ovog člana, o predaji oružja i municije na čuvanje obavijestiti nadležnu policijsku upravu u roku od osam dana od dana predaje.
- (5) Imaoci oružja koji oružje drže na osnovu oružnog lista, odnosno odobrenja dužni su da na poziv nadležne policijske uprave donesu oružje na pregled.

Član 28.  
(Zabrana nošenja oružja)

- (1) Zabranjeno je nošenje vatrenog, vazdušnog i hladnog oružja na javnim i vjerskim okupljanjima, u školama, zdravstvenim i javnim ustanovama, ugostiteljskim objektima i prostorima koji se koriste za pružanje ugostiteljskih usluga, kao i drugim javnim mjestima.
- (2) Odredba stava (1) ovog člana ne odnosi se na sportsko oružje u slučaju kada se ono nosi radi takmičenja u gađanju.
- (3) Oružje se ne smije nositi na javnom mjestu na način kojim se može izazvati osjećanje fizičke ugroženosti, uznemirenosti ili negodovanje građana.
- (4) Van lovišta odnosno strelišta vatreno i vazdušno oružje mora se držati, odnosno nositi u futrola i ne smije biti napunjeno.

Član 29.  
(Davanje oružja na poslugu)

- (1) Zabranjeno je davanje pištolja i revolvera na poslugu drugom fizičkom i pravnom licu.
- (2) Lovačko, sportsko i vazdušno oružje može se davati na poslugu fizičkom licu koje ima oružni list za tu vrstu oružja i u slučajevima propisanim u čl. 32. i 33. ovog zakona.

Član 30.  
(Nabavljanje oružja za pravna lica)

- (1) Državnim organima i drugim pravnim licima, izuzimajući streljačke organizacije i organizacije koje gazduju lovištima, nadležna policijska uprava može izdati odobrenje za nabavljanje i držanje oružja i municije za to oružje samo ako su organizovane u skladu sa Zakonom o agencijama za zaštitu ljudi i imovine i uz prethodnu saglasnost Federalnog ministarstva unutrašnjih poslova.
- (2) Državni organi i druga pravna lica dužni su da u roku od osam dana od dana nabavke oružja i municije o tome obavijeste nadležnu policijsku upravu radi izdavanja odobrenja za držanje oružja i da vode evidenciju o nabavljenom oružju i municiji.

Član 31.  
(Povjeravanje nošenja oružja i municije)

- (1) Državni organi i druga pravna lica koja drže oružje i municiju na osnovu člana 30. stav (1) ovog zakona, mogu povjeriti njihovo nošenje samo licima koja obavljaju poslove zaštite i koja ispunjavaju uslove za nošenje oružja propisane ovim zakonom i Zakonom o agencijama za zaštitu ljudi i imovine.
- (2) Lica iz stava (1) ovog člana, oružje i municiju koja im je povjerena mogu nositi samo za vrijeme dok obavljaju poslove zaštite i isto ne smiju iznositi van objekta ili područja koje se obezbjeđuje ili čuva.
- (3) Izuzetno, od odredbe stava (2) ovog člana, čuvari usjeva i šuma i čuvari lova i ribolova koji ne stanuju na području koje čuvaju, mogu iznositi oružje i van tog područja i nositi ga do svog mjesta stanovanja, a čuvari stada, kao i lica koja obezbjeđuju imovinu koja se prevozi ili prenosi, mogu nositi oružje prilikom obezbjeđenja te imovine.
- (4) Državni organi i druga pravna lica iz stava (1) ovog člana, izdaju posebnu potvrdu licu kome povjeravaju oružje i o tome su dužni obavijestiti nadležnu policijsku upravu.
- (5) Obrazac i sadržaj obrasca potvrde iz stava (4) ovog člana propisuje ministar na prijedlog policijskog komesara.

### Član 32.

(Davanje na poslugu sportskog oružja)

- (1) Streljačke organizacije mogu davati na poslugu oružje i municiju samo svojim članovima i to za vrijeme dok vrše vježbe gađanja ili se takmiče u gađanju na strelištu i na drugom terenu određenom za vršenje vježbi gađanja, odnosno takmičenja u gađanju.
- (2) Ako se magazin oružja streljačke organizacije ne nalazi na strelištu, članovi streljačke organizacije moraju za nošenje oružja do strelišta ili do drugog terena određenog za vršenje vježbi gađanja, odnosno takmičenja u gađanju imati potvrdu streljačke organizacije o vršenju vježbi gađanja, odnosno takmičenja u gađanju. Ova potvrda važi samo za dane kada se vrši vježba gađanja, odnosno takmičenje u gađanju.

### Član 33.

(Davanje na poslugu lovačkog oružja)

- (1) Organizacija koja gazduje lovištem, može uz prethodnu saglasnost nadležne policijske uprave radi odstrela divljači, članovima domaćih i inostranih lovačkih organizacija dati na poslugu lovačko oružje i municiju najduže osam dana i to samo za lov u određenom lovištu.
- (2) Za oružje i municiju izdatu na poslugu u smislu stava (1) ovog člana organizacija koja gazduje lovištem izdaje potvrdu za nošenje oružja i municije o čemu vodi evidenciju.
- (3) Lice kome je dato oružje i municija na poslugu prema odredbama st. (1) i (2) ovog člana ne smije iznositi oružje i municiju van lovišta kojim gazduje organizacija iz stava (1) ovog člana.

### Član 34.

(Postupanje u slučaju prestanka potrebe za daljnjim držanjem oružja i municije)

- (1) Državni organi i druga pravna lica kod kojih je iz bilo kojih razloga prestala potreba za daljim držanjem oružja i municije, obavijestit će o tome u roku od 30 dana nadležnu policijsku upravu na čijem području se oružje drži.
- (2) Nadležna policijska uprava preuzet će oružje i preostalu municiju iz stava (1) ovog člana i postupit će u smislu odredaba člana 39. ovog zakona.

### Član 35.

(Postupanje u slučaju gubljenja ili krađe oružja i isprava o oružju)

- (1) Državni organi, druga pravna lica i fizička lica koja drže i nose registrovano oružje i oružje koje je nabavljeno na osnovu odobrenja za nabavljanje oružja, a nije registrovano u roku iz člana 17. stav (1) ovog zakona, dužni su prijaviti gubljenje ili krađu oružja i municije odmah, a najkasnije u roku od 24 sata.
- (2) Državni organi, druga pravna lica i fizička lica dužni su prijaviti gubljenje ili krađu odobrenja za držanje oružja, oružnog lista i odobrenja za nabavljanje oružja odmah, a najkasnije u roku od 24 sata.
- (3) Državni organi, druga pravna lica i fizička lica dužni su o vlastitom trošku u službenim novinama oglastiti nestanak isprava o oružju, osim odobrenja za nabavljanje oružja i municije.
- (4) Prijave iz st. (1) i (2) ovog člana podnose se nadležnoj policijskoj upravi prema mjestu događaja ili saznanja o gubljenju ili krađi oružja i municije. U prijavi se moraju navesti okolnosti pod kojima su oružje i municija izgubljeni ili ukradeni, a koje su podnosiocu prijave poznati.

Član 36.  
(Pronalazak oružja ili municije)

Ko nađe oružje ili municiju ili sazna za sakriveno oružje ili municiju dužan je o tome odmah obavijestiti najbližu policijsku upravu, policijsku stanicu ili policijskog službenika.

Član 37.  
(Obaveza prijave promjene prebivališta, odnosno sjedišta)

Ako imalac kome je izdat oružni list, odnosno odobrenje za držanje oružja, promijeni prebivalište, odnosno sjedište, dužan je da u roku od 30 dana od dana promjene prebivališta, odnosno sjedišta, prijavi promjenu prebivališta, odnosno sjedišta nadležnoj policijskoj upravi na čijem području je novo prebivalište, odnosno sjedište tog imalca, radi upisa u evidenciju o izdatim oružnim listovima, odnosno o izdatim odobrenjima za držanje oružja.

Član 38.  
(Dotrajalo oružje)

- (1) Imalac oružja čije je oružje dotrajalo u tolikoj mjeri da njegova upotreba može ugroziti bezbjednost ljudi, a ne postoji mogućnost da se oružje popravi ili prepravi, dužan je takvo oružje predati nadležnoj policijskoj upravi i podnijeti zahtjev da se briše iz evidencije o nabavljenom oružju.
- (2) Oružje iz stava (1) ovog člana prima se uz izjavu stranke datu na zapisnik da se oružje predaje bez naknade.
- (3) Sa zamijenjenim tehnički neispravnim dijelovima vatrenog i vazdušnog oružja postupa se u skladu sa st. (1) i (2) ovog člana.

B) Oduzimanje oružja i municije

Član 39.  
(Oduzimanje registrovanog oružja i municije)

- (1) Oružje i municija, kao i oružni list, odnosno odobrenje za držanje oružja, oduzet će se ako nastupi koji od slučajeva iz člana 20. stav (2) tač. b), c), d) i e) i stava (3) tačka a), člana 22. stav (2), kao i u slučajevima iz člana 11. stav (8) ovog zakona.
- (2) U slučajevima iz stava (1) ovog člana može se oduzeti i trofejno oružje, kao i staro vatreno oružje.
- (3) Protiv rješenja o oduzimanju iz st. (1) i (2) ovog člana može se izjaviti žalba policijskom komesaru u roku od 15 dana od dana prijema rješenja.
- (4) Protiv konačnog rješenja iz stava (3) ovog člana ne može se voditi upravni spor.

Član 40.  
(Oduzimanje neregistrovanog oružja i municije)

- (1) Nadležna policijska uprava rješenjem će oduzeti oružje i municiju od pojedinca, državnih organa i drugih pravnih lica koji nabave oružje ili municiju bez propisanog odobrenja za nabavljanje ili drže oružje bez oružnog lista odnosno bez propisanog odobrenja za držanje.
- (2) Protiv rješenja o oduzimanju iz stava (1) ovog člana može se izjaviti žalba policijskom komesaru u roku od 15 dana od dana prijema rješenja.
- (3) Protiv konačnog rješenja iz stava (2) ovog člana ne može se voditi upravni spor.
- (4) Oružje i municija po odredbi stava (1) ovog člana oduzimaju se bez prava naknade i isto se uništava u skladu sa odredbama člana 41. st. (4) i (5).

#### Član 41.

(Postupak sa oduzetim oružjem i municijom)

- (1) Oduzimanje oružja, municije i oružnog lista odnosno odobrenja za držanje oružja po odredbama čl. 11. stav (8), 38. st. (1) i (2), 39. ovog zakona vrši nadležna policijska uprava.
- (2) Za oduzeto oružje, municiju i oružni list, odnosno odobrenje za držanje oružja izdaje se potvrda.
- (3) Po pravosnažnosti rješenja o oduzimanju oružja, nadležna policijska uprava pozvat će imaoca oružja da u roku od šest mjeseci nađe kupca za oduzeto oružje i municiju. Ako imalac u tom roku ne nađe kupca oduzeto oružje i municija će se uništiti.
- (4) U skladu sa odlukom Ministarstva, postupak uništenja oduzetog oružja i municije sprovodi posebna komisija koju obrazuje Vlada Kantona Sarajevo.
- (5) Komisija iz stava (4) ovog člana, o uništenju oduzetog oružja i municije sačinjava zapisnik koji se ulaže u odnosni spis Ministarstva.

#### C) Promet oružja i municije na malo

#### Član 42.

(Pravna lica ovlaštena za promet oružjem i municijom na malo)

- (1) Prometom oružja i municije mogu se baviti pravna lica kod kojih je promet oružja i municije registrovan kao jedna od djelatnosti kojom se bave, uz odobrenje nadležnog organa.
- (2) Pravna lica iz stava (1) ovog člana dužna su da u roku od osam dana od dana registracije obavijeste nadležnu policijsku upravu da su registrovana za djelatnost prometa oružja i municije.
- (3) U pravnim licima iz stava (1) ovog člana poslove i zadatke prometa oružja i municije može obavljati samo punoljetno lice koje ispunjava uvjete propisane članom 20. stav (2) tač. b), c), d) i e) i stav (3) ovog zakona.

#### Član 43.

(Prodaja oružja i municije na malo)

- (1) Pravna lica iz člana 42. ovog zakona mogu prodavati oružje i municiju samo organima, pravnim i fizičkim licima koji imaju odobrenje za nabavljanje oružja i municije.
- (2) Pravna lica iz člana 42. ovog zakona dužna su da:
  - a) prilikom prodaje oružja i municije zadrže jedan primjerak odobrenja za nabavljanje oružja i municije, a na drugi primjerak stave zabilješku o izvršenoj prodaji i ovjere je štambiljem i potpisom odgovornog lica i
  - b) u roku od pet dana od dana prodaje o tome pismeno obavijeste nadležnu policijsku upravu koja je izdala odobrenje za nabavljanje oružja i municije.
- (3) Pravna lica iz člana 42. ovog zakona mogu fizičkim licima, koji imaju oružni list za lovačko oružje sa neolučenim cijevima ili za vazdušno oružje, prodavati municiju na osnovu oružnog lista koji je izdat za to oružje.

#### Član 44.

(Evidencija o nabavljenom i prodatom oružju i municiji)

- (1) Pravna lica iz člana 42. ovog zakona dužna su da vode evidenciju o nabavljenom i prodatom oružju i municiji.

- (2) Evidencija o prometu oružja i municije vodi se u knjigama evidencije po vrstama oružja i municije, koje moraju biti ovjerene od nadležne policijske uprave.

#### Član 45.

(Čuvanje i držanje oružja od strane pravnih lica)

Pravna lica koja se bave prometom oružja i municije, kao i državni organi i druga pravna lica koja drže oružje i municiju na osnovu ovog zakona, dužni su da oružje i municiju drže i čuvaju u skladu sa ovim zakonom i drugim zakonima koji propisuju istu oblast.

#### Član 46.

(Propisi o smještaju i čuvanju oružja i obaveznim evidencijama)

Bliže propise o smještaju i čuvanju oružja, o vođenju evidencije o nabavljenom oružju i municiji, vođenju evidencije o prodatom oružju i municiji i vođenju evidencije o potvrđama za nošenje oružja i municije izdatih od strane streljačkih organizacija i organizacije koja gazduje lovištem, kao i obrascima i sadržaju obrazaca za vođenje tih evidencija, na prijedlog policijskog komesara, donosi ministar.

#### D) Popravljanje i prepravljanje oružja i municije

#### Član 47.

(Pravna lica i samostalne radnje ovlaštene za popravljanje i prepravljanje oružja)

- (1) Popravljanjem i prepravljanjem oružja mogu se baviti pravna lica i samostalne radnje koje su registrovane da se bave popravljanjem i prepravljanjem oružja, ili je popravljanje i prepravljanje oružja registrovano kao jedna od djelatnosti kojom se one bave.
- (2) Pravna lica i samostalne radnje iz stava (1) ovog člana dužni su da u roku od osam dana od dana registracije obavijeste nadležnu policijsku upravu da su registrovane za popravljanje i prepravljanje oružja.
- (3) U pravnom licu i samostalnim radnjama iz stava (1) ovog člana popravljanje i prepravljanje oružja može obavljati samo punoljetno lice koje ispunjava uvjete propisane članom 20. stav (2) tač. b), c), d) i e) i stav (3) ovog zakona.

#### Član 48.

(Oružje koje može biti predmet popravljanja i prepravljanja)

Pravna lica i samostalne radnje iz člana 47. ovog zakona mogu primiti radi popravljanja i prepravljanja samo oružje za koje je izdat oružni list, odnosno odobrenja za držanje ili nabavljanje oružja.

#### Član 49.

(Evidencija i propisi o načinu vođenja evidencija)

- (1) Pravno lice i samostalne radnje koje se bave popravljanjem i prepravljanjem oružja dužne su voditi evidenciju o popravljenom i prepravljenom oružju.
- (2) Bliže propise o načinu vođenja evidencija o popravljenom i prepravljenom oružju i obrascima i sadržaju obrazaca o vođenju ove evidencije, na prijedlog policijskog komesara, donosi ministar.

## E) Nadzor

### Član 50.

(Nadzor koji provode nadležne policijske uprave)

- (1) Nadležne policijske uprave, ako zakonom nije drugačije određeno, vrše neposredni nadzor nad prodajom, držanjem i nošenjem oružja i municije, nad čuvanjem i smještajem oružja od strane pravnih lica koja se bave prometom oružja i municije, streljačkih organizacija, organizacija koje gazduju lovištem i pravnih lica i samostalnih radnji koje se bave popravljanjem i prepravljanjem oružja, kao i nadzor nad vođenjem evidencija o:
  - a) nabavljenom oružju i municiji,
  - b) prodatom oružju i municiji,
  - c) popravljenom i prepravljenom oružju i municiji,
  - d) oružju i municiji datom na poslugu i
  - e) oružju i municiji datom na čuvanje.

### Član 51.

(Komisija za nadzor)

- (1) U cilju zakonitog rada, provođenja i primjene ovog zakona policijski komesar formirat će Komisiju za nadzor.
- (2) Policijski komesar će posebnim aktom propisati nadležnost i sastav Komisije iz stava (1) ovog člana.
- (3) Komisija ostvaruje pravo na naknadu koju će posebnim aktom utvrditi ministar.

### Član 52.

(Privremeno oduzimanje oružja, municije i oružnog lista)

- (1) Policijski službenici Ministarstva, mogu od lica za koje postoje osnovi sumnje da je izvršilo krivično djelo ili prekršaj određen ovim zakonom i sami privremeno oduzeti oružni list, kao i oružje, dijelove za oružje i municiju za koje postoje osnovi sumnje da je s njima izvršeno krivično djelo ili prekršaj ili su pribavljeni krivičnim djelom ili prekršajem ili su nastali izvršenjem krivičnog djela ili prekršaja.
- (2) Prilikom izvršavanja ovlaštenja propisanih u stavu (1) ovog člana, policijski službenici Ministarstva dužni su izdati potvrdu o privremeno oduzetim predmetima.

### Član 53.

(Evidencija otisaka oružja)

- (1) Državni organi, pravna i fizička lica koji imaju registrovano oružje na području Kantona Sarajevo, dužni su omogućiti Ministarstvu uzimanje otisaka oružja (mehanički trag) radi unosa otiska u propisanu evidenciju.
- (2) Ministarstvo će, za obavljanja poslova iz stava (1) ovog člana, kao i za vođenje zbirki oružja i municije, sistematizovati posebno radno mjesto.
- (3) Za uzimanje otisaka oružja iz stava (1) ovog člana ne naplaćuje se naknada.

## F) Kaznene odredbe

Član 54.  
(Krivična djela)

- (1) Novčanom kaznom ili kaznom zatvora od šest mjeseci do dvije godine kaznit će se za krivično djelo:
- a) ko bez odobrenja nabavi, drži ili nosi vatreno oružje, dijelove za vatreno oružje ili municiju, kada je za nabavljanje tog oružja, dijelova za oružje i municije potrebno odobrenje (član 8. st. (1), (2), (4), (5) i (6)),
  - b) ko proda vatreno oružje, dijelove za vatreno oružje ili municiju pravnom ili fizičkom licu koji nemaju odobrenje za nabavljanje te vrste oružja (čl. 19. stav (1) i 43. stav (1)) i
  - c) ko drugom da pištolj ili revolver na poslugu (član 29. stav (1)) ili ko da na poslugu lovačko oružje ili sportsko vatreno oružje licu koje za tu vrstu oružja nema oružni list (član 29. stav (2)).
- (2) Za krivična djela iz stava (1) ovog člana obavezno se izriče i zaštitna mjera oduzimanja oružja, dijelova za oružje i municije.
- (3) U izvršenju zaštitne mjere iz stava (2) ovog člana za krivično djelo iz stava (1) tač. b) i c) ovog člana oduzima se oružni list, odnosno odobrenje za držanje oružja.

Član 55.  
(Novčane kazne i zaštitne mjere za fizička lica)

- (1) Novčanom kaznom od 500,00 do 1.500,00 KM kaznit će se za prekršaj:
- a) ko nabavi, drži ili nosi vatreno oružje bez označene marke, kalibra i fabričkog broja, oružje sa integralnim prigušivačem, prigušivače namijenjene oružju i dijelove za prigušivače, oružje koje ima oblik predmeta druge namjene, tako da po svom vanjskom izgledu nije prepoznatljivo kao oružje, rasprskavajuće, gasno ili hladno oružje (član 9. stav (1) tač. c), d), f), g), h) i i)),
  - b) ko bez odobrenja nabavi, drži, nosi, proda ili da na poslugu vazdušno oružje ili dijelove za vazdušno oružje (član 8. st. (1) i (2)),
  - c) ko skuplja staro oružje bez odobrenja (član 13. stav (2)) ili ko upotrebljava staro oružje kao oružje ili nabavlja, spravlja ili drži municiju za ovo oružje (član 13. stav (3)), kao i imalac starog oružja koji to oružje ne prijavi nadležnoj policijskoj upravi (član 13. stav (4)) i
  - d) ko postupi protivno odredbama čl. 10 i 28. ovog zakona.
- (2) Za prekršaje iz stava (1) ovog člana, obavezno se izriče i zaštitna mjera oduzimanja oružja, dijelova za oružje i municije.
- (3) U izvršenju zaštitne mjere iz stava (2) ovog člana oduzima se oružni list.

Član 56.  
(Novčane kazne i zaštitne mjere za fizička lica)

- (1) Novčanom kaznom od 300,00 KM do 1.000,00 KM kaznit će se za prekršaj:
- a) ko zamijenjene tehnički ispravne dijelove vatrenog i vazdušnog oružja koji se označavaju fabričkim brojem ne preda nadležnoj policijskoj upravi (član 8. stav (3)),
  - b) ko drži ili nosi oružje bez oružnog lista kad je za držanje ili nošenje tog oružja potreban oružni list ili ko na zahtjev policijskog službenika i drugog ovlaštenog službenog lica Ministarstva ne omogući uvid u to oružje ili oružni list (član 11. stav (2)),
  - c) ko bez odobrenja drži trofejno oružje, ili ga nosi ili upotrebljava, ili za ovo oružje drži ili nabavlja municiju (član 12.),

- d) ko nabavi, drži i nosi oružje za signalizaciju i oružje za uspavlivanje životinja protivno odredbama člana 14. ovog zakona,
- e) ko u propisanom roku ne prijavi nabavku snajpera (član 15. stav (1)), ili ko u propisanom roku ne prijavi otuđenje, nestanak ili gubljenje snajpera (član 15. stav (2)),
- f) ko ne preda na čuvanje nadležnoj policijskoj upravi oružje, oružni list, odnosno dozvolu za držanje trofejnog oružja i municije u slučaju smrti imaoaca oružja (član 16. stav (1)),
- g) ko u propisanom roku ne podnese pismeni zahtjev nadležnoj policijskoj upravi o izvršenoj nabavci oružja (član 17. stav (1)), odnosno ko u propisanom roku ne vrati odobrenje za nabavljanje oružja (član 17. stav (2)),
- h) ko u propisanom roku ne prijavi zamjenu vatrenog oružja (član 18. stav (2)),
- i) ko u propisanom roku ne prijavi prenos prava svojine na vatreno i vazdušno oružje (član 19. stav (2)),
- j) ko postupi protivno odredbama člana 26. ovog zakona,
- k) ko postupi protivno odredbama člana 27. ovog zakona,
- l) ko nosi oružje ili municiju koji su mu povjereni u vrijeme kada ne vrši službu, ili iznese oružje i municiju van područja odnosno objekta koji se obezbjeđuje ili čuva (član 31. stav (2)),
- m) član streljačke organizacije koji nosi oružje van strelišta ili drugog terena određenog za vršenje vježbi gađanja odnosno takmičenja u gađanju, bez potvrde streljačke organizacije o vršenju vježbi gađanja odnosno takmičenja u gađanju (član 32. stav (2)),
- n) ko ne vrati organizaciji koja gazduje lovištem oružje odnosno neutrošenu količinu municije dobijenu na poslugu u određenom roku ili ih upotrebljava, odnosno iznosi van određenog lovišta (član 33.),
- o) ko ne prijavi nestanak oružja ili municije koje drži na osnovu oružnog lista ili na osnovu odobrenja za držanje oružja (član 35. st. (1) i (2)),
- p) ko u propisanom roku ne prijavi promjenu prebivališta radi evidentiranja oružja (član 37.),
- r) ko postupi protivno odredbama člana 38. st. (1) i (3) ovog zakona i
- s) ko ne omogući Ministarstvu uzimanje otisaka oružja (mehanički trag) radi unosa otiska u propisanu evidenciju (član 53. stav (1)).

(2) Za prekršaje iz stava (1) tač. b), c), d), e), f), g), h), i), j), k), p) i r) ovog člana, obavezno se izriče i zaštitna mjera oduzimanja oružja, kao i zaštitna mjera oduzimanja snajpera.

(3) U izvršenju zaštitne mjere iz stava (2) ovog člana oduzima se, municija, oružni list, odnosno odobrenje za držanje trofejnog oružja.

#### Član 57.

(Novčane kazne i zaštitne mjere za pravna lica)

(1) Novčanom kaznom od 5.000,00 do 15.000,00 KM kaznit će se za prekršaj:

- a) pravna lica koja u u određenom roku ne prijave nabavku snajpera (član 15. stav (1)), ili koja u određenom roku ne prijavi otuđenje, nestanak ili gubljenje snajpera (član 15. stav (2)),
- b) pravna lica koja u propisanom roku ne podnesu pismeni zahtjev nadležnoj policijskoj upravi za registraciju oružja i municije (član 17. stav (1)), koja u propisanom roku ne vrate odobrenje za nabavljanje oružja i municije (član 17. stav (2)), odnosno ne vode evidenciju o nabavljenom oružju i municiji (član 30. stav (2)),
- c) pravna lica koja u određenom roku ne prijave prenos prava korištenja i raspolaganja na oružje nadležnoj policijskoj upravi (član 19. stav (2)),
- d) pravna lica koja povjere nošenje oružja i municije licu koje nije određeno da neposredno vrši poslove zaštite i koje ne ispunjava uslove za nošenje oružja

propisane ovim zakonom (član 31. stav (1)) ili koje naredi ili dozvoli da lice kome je povjereno oružje radi vršenja poslova zaštite nosi to oružje suprotno odredbama člana 31. st. (2) i (3) ovog zakona, odnosno koja ne obavijeste nadležnu policijsku upravu o licu kojem je povjerila oružje (član 31. stav (4)),

- e) streljačka organizacija koja da na upotrebu oružje i municiju licu koje nije njen član, ili da oružje i municiju svom članu suprotno odredbama člana 32. ovog zakona,
  - f) pravno lice koje gazduje lovištem ako postupi suprotno odredbama člana 33. st. (1) i (2) ovog zakona,
  - g) pravno lice koje ne obavijesti u propisanom roku nadležnu policijsku upravu o prestanku potrebe za daljnjim držanjem oružja i municije (član 34. stav (1)),
  - h) pravno lice koje ne prijavi u propisanom roku nestanak oružja koje drži na osnovu odobrenja za držanje, kao i nestanak municije (član 35. st. (1) i (2)),
  - i) pravno lice koje ne preda oružje koje je dotrajalo u tolikoj mjeri da njegova upotreba može ugroziti bezbjednost ljudi, a koje se ne može popraviti ili prepraviti ili ne preda zamijenjene tehnički neispravne dijelove vatrenog ili vazdušnog oružja (član 38. st. (1) i (3)),
  - j) pravna lica koja se bave prometom oružja i municije protivno odredbama člana 42. ovog zakona,
  - k) pravna lica koja se bave prometom oružja i municije ako postupe protivno odredbama člana 43. st. (2) i (3) ovog zakona,
  - l) pravna lica koja se bave prometom oružja i municije ako ne vode evidenciju o nabavljenom i prodatom oružju i municiji, ili je ne vode u knjigama evidencije po vrstama oružja i municije (član 44.),
  - m) pravna lica koja ne drže ili ne čuvaju oružje i municiju na propisan način (član 45.),
  - n) pravna lica i samostalne radnje koje se bave popravljanjem i prepravljanjem oružja protivno odredbama člana 47. ovog zakona,
  - o) pravna lica i samostalne radnje koje prime na popravljanje ili prepravljanje oružja za koje nije izdat oružni list ili odobrenje za nabavljanje i držanje oružja (član 48.),
  - p) pravna lica i samostalne radnje koje se bave popravljanjem i prepravljanjem oružja ako ne vode evidenciju o popravljenom i prepravljenom oružju, ili je ne vode na propisanom obrascu (član 49.) i
  - r) ko ne omogući Ministarstvu uzimanje otisaka oružja (mehanički trag) radi unosa otiska u propisanu evidenciju (član 51. stav (1)).
- (2) Za prekršaje iz stava (1) ovog člana kaznit će se novčanom kaznom od 500,00 do 1.500,00 KM i odgovorno lice u pravnom licu, odnosno samostalnoj radnji.
- (3) Za prekršaj iz stava (1) tač. a), c), g), i), m) i o) ovog člana izreći će se i zaštitna mjera oduzimanja predmeta, a za prekršaje iz stava (1) tač. j), p), n) i o) izreći će se i zaštitna mjera zabrane vršenja djelatnosti do šest mjeseci.

### III – ZAVRŠNI DIO

#### A) Prelazne odredbe

#### Član 58. (Propisi ministra)

U roku od tri mjeseca od dana stupanja na snagu ovog zakona, ministar će, na prijedlog policijskog komesara, donijeti propise o:

- a) evidencijama koje se vode u Ministarstvu u vezi sa nabavljanjem, držanjem i nošenjem oružja, obrasce, sadržaj obrazaca i način vođenja tih evidencija,

- b) načinu vođenja evidencije o popravljenom i prepravljenom oružju i obrascima i sadržaju obrazaca za vođenje ove evidencije,
- c) obrascu i sadržaju obrasca oružnog lista,
- d) obrascu i sadržaju obrasca potvrde koju državni organi i druga pravna lica izdaju licu kome povjeravaju oružje i municiju, obrascu i sadržaju knjige o primopredaji oružja i municije i obrascu i sadržaju evidencije o potvrdama za nošenje oružja i municije izdatih od organizacije koja gazduje lovištem,
- e) smještanju i čuvanju oružja, vođenju evidencije o nabavljenom oružju i municiji, vođenju evidencije o prodatom oružju i municiji i obrascima i sadržaju obrazaca za vođenje tih evidencija,
- f) obrascu i sadržaju evidencije o predatom oružju na čuvanje i
- g) programu obuke i načinu osposobljavanja za pravilno rukovanje, držanje i nošenje kratkog vatrenog oružja.

#### Član 59.

(Zamjena oružnih listova izdatih od strane nadležnih organa u Bosni i Hercegovini po ranijem zakonodavstvu)

- (1) Lica koja u trenutku stupanja na snagu ovog zakona imaju oružni list, bez obzira na datum njegovog izdavanja od strane nadležnog organa u Bosni i Hercegovini, dužna su u roku od jedne godine od dana stupanja na snagu ovog zakona, podnijeti zahtjev za zamjenu oružnog lista nadležnoj policijskoj upravi.
- (2) Postupak iz stava (1) ovog člana provodi se u skladu sa članom 11. stav (7) ovog zakona.
- (3) Ukoliko lice ne postupi u skladu sa stavom (1) ovog člana, primjeniće se odredbe člana 11. stav (8) ovog zakona.

#### Član 60.

(Primjena ograničenja u nabavljanju pištolja i revolvera)

Odredbe člana 24. ovog zakona ne odnose se na lica koja imaju registrovano oružje prije stupanja na snagu ovog zakona.

#### Član 61.

(Primjena Zakona o agencijama za zaštitu ljudi i imovine)

Odredbe ovog zakona primjenjuju se na pravna lica koja obavljaju poslove fizičke i tehničke zaštite, ukoliko nisu u suprotnosti sa Zakonom o agencijama za zaštitu ljudi i imovine.

#### B) Završne odredbe

#### Član 62.

(Ravnopravnost spolova)

Gramatička terminologija u ovom zakonu podrazumijeva uključivanje oba spola.

#### Član 63.

(Prestanak važenja)

Danom stupanja na snagu ovog zakona prestaje primjena Zakona o nabavljanju, držanju i nošenju oružja i municije ("Službene novine Kantona Sarajevo", br. 29/01, 16/02 i 10/05).

Član 64.  
(Stupanje na snagu)

Ovaj zakon stupa na snagu narednog dana od dana objavljivanja u "Službenim novinama Kantona Sarajevo".

Broj: \_\_\_\_\_  
Sarajevo, \_\_. \_\_. 2007. godine

PREDSJEDAVAJUĆI  
SKUPŠTINE KANTONA SARAJEVO

Mr. Denis Zvizdić

## O B R A Z L O Ž E N J E

### Pravni osnov

Pravni osnov za donošenje ovog zakona sadržan je u odredbama člana 18. tačka b) Ustava Kantona Sarajevo, kojim je utvrđena zakonodavna funkcija Skupštine Kantona.

### Razlozi donošenja

Razlog za donošenje novog Zakona o nabavljanju, držanju i nošenju oružja i municije (u daljnjem tekstu: Zakon) je njegovo usklađivanje sa nizom zakona koji na posredan način utiču na pravna rješenja koja sadrži važeći zakon, kao i potreba da se preciznije uredi oblast nabavljanja, držanja i nošenja oružja i municije na području Kantona Sarajevo.

Zakon o prekršajima Federacije Bosne i Hercegovine („Službene novine Federacije BiH“, broj 31/06), u Odjeljku II – SANKCIJE, pored ostalog propisuje i novčane kazne i zaštitne mjere sa kojima je neophodno uskladiti kazne i zaštitne mjere koje su propisane u Zakonu.

Posebni propis koji uređuje oblast unutrašnjih poslova je Zakon o unutrašnjim poslovima Kantona Sarajevo („Službene novine Kantona Sarajevo“, br. 22/00 – Prečišćeni tekst, 15/02, 18/02 i 28/02) koji je svojim izmjenama prestrukturirao nadležnosti za oblast nabavke, posjedovanja i nošenja oružja i municije.

Zakon o policijskim službenicima Kantona Sarajevo („Službene novine Kantona Sarajevo“, broj 25/06) je uveo terminološki drugačija pravna rješenja od ranije propisanih.

Takođe je donesen Zakon o agencijama za zaštitu ljudi i imovine („Službene novine Federacije BiH“, broj 50/02) od kojeg se pojedine odredbe moraju inkorporirati u Zakon.

Pored navedenog, radi se o izuzetno značajnom propisu za ukupnu sigurnost na području Kantona Sarajevo, tako da odredbe Zakona, odnosno predložena konkretna pravna rješenja idu u pravcu obezbjeđenja što većeg nivoa sigurnosti građana.

Obzirom na navedeno pristupilo se izradi novog Zakona.

### Pravna rješenja

### UVODNI DIO

Odredbe čl. 1. do 7. pored preciznijeg definisanja predmeta Zakona, propisuje područje njegove primjene (teritorijalno i personalno) uključujući i određivanje izuzetaka u primjeni. Precizno su definisane sve vrste oružja koje tretira Zakon, uključujući dijelove za vatreno i vazdušno oružje i municiju te značenje ostalih izraza upotrijebljenih u Zakonu.

## GLAVNI DIO

Zakona podijeljen je u više odjeljaka:

### A) Nabavljanje, držanje i nošenje oružja i municije (čl. 8. do 38.)

Ovaj odjeljak je precizno odredio koji je organ nadležan da u prvostepenom postupku izdaje odobrenje za nabavljanje oružja i municije, definisao je vrste oružja, naprave i municiju čije je nabavljanje, držanje, nošenje, popravljavanje, prepravljavanje i promet zabranjen kao i zabranu nošenja oružja na javnim mjestima.

Pored obaveze izdavanja oružnog lista, određen je i rok njegovog važenja od 10 godina (potpuno novo rješenje), istekom kojeg imalac oružja može, pod Zakonom određenim uslovima i proceduri, produžiti njegovu važnost. Pravno rješenje po kojem se imaocu oružja izdaje oružni list na neodređeno vrijeme, a naročito u poslijeratnim uslovima kada dolazi do povećanja intenziteta kriminaliteta i prekrižaja uz upotrebu oružja i municije (pravosnažne sudske odluke), odnosno kada dolazi do intenzivnog i bitnog mijenjanja uvjeta potrebnih za izdavanje odobrenja za držanje i nošenje oružja i municije (npr. zdravstveno stanje), nije održivo. Zbog toga je predložen vremenski period od 10 godina, kao period u kojem može nastati niz promjena u pogledu potrebnih uvjeta. Ovaj postupak "provjere" pokreće se po zahtjevu stranke kao npr. kod produženja vozačke dozvole i sl., a ne po službenoj dužnosti. Ukoliko stranka ne želi da podnese zahtjev za produženje oružnog lista propisana je konkretna procedura.

Posebno su obrađeni uvjeti za nabavljanje, držanje i nošenje trofejnog i starog oružja, kao i oružja za signalizaciju, oružja za uspavljivanje životinja i snajpera. Propisan je postupak u slučaju smrti imaoca oružja. Utvrđene su obaveza i rok prijavljivanja nabavke oružja, mogućnost i rok za prijavu zamjene vatrenog oružja, uvjeti prenosa prava svojine nad vatrenim i vazdušnim oružjem i rok predaje dokumentacije za oružje od strane prodavca nadležnoj policijskoj upravi.

Ovim zakonom je posebna pažnja posvećena uvjetima potrebnim za izdavanje odobrenja za nabavljanje oružja te su isti podijeljeni na opće i posebne (novo pravilo, odnosno procedura). Tako je, u odnosu na raniji zakon, kao opći uvjet propisana minimalna starosna dob od 21 godine, sa određenim izuzecima, obavezno postojanje opravdanog razloga za nabavljanje oružja te usklađivanje uvjeta koji se odnosi na kažnjavanje za prekršaj i prekršajni postupak sa odredbama Zakona o prekršajima Federacije BiH. Kao posebni uvjeti propisani su zdravstvena sposobnost za držanje i nošenje oružja i, kao potpuno nov uvjet, raspolaganje tehničkim znanjem za pravilno rukovanje oružjem i poznavanje propisa koji se odnose na držanje i nošenje oružja. Takođe je posebno propisan postupak i nadležnost za utvrđivanje općih i posebnih uvjeta, te način dokazivanja njihovog ispunjavanja uz predviđene izuzetke za određene kategorije lica. Posebnim članom propisan je postupak i uvjeti odbijanja zahtjeva za izdavanje odobrenja za nabavljanje oružja i municije u cilju zaštite interesa javnog reda i mira i interesa bezbjednosti. Članom 23. Zakona propisano je pravo žalbe protiv rješenja policijske uprave o odbijanju zahtjeva za izdavanje odobrenja za nabavljanje oružja ili municije. Konačno rješenje donosi policijski komesar.

Ograničenje u pogledu broja pištolja i revolvera koje može imati jedno lice ima za cilj ukupno smanjenje količine vatrenog oružja i municije, koje se nalaze u posjedu građana, što u krajnjoj liniji doprinosi poboljšanju ukupne sigurnosti društvene zajednice.

Posebna pažnja posvećena je čuvanju i postupanju sa oružjem i municijom, kao i zabrani nošenja oružja na javnim i vjerskim okupljanjima, javnim mjestima, prostorima i objektima, kao doprinos discipliniranju imaoca oružja čime se u krajnjoj liniji izbjegavaju teške i tragične posljedice koje mogu nastupiti.

Davanje oružja na poslu je generalno, uz izuzetke lovačkog, sportskog i vazdušnog oružja (uz oružni list), zabranjeno i u kaznenim odredbama propisano kao krivično djelo.

Postupak nabavljanja oružja od strane pravnih lica, kao i uvjeti njegovog povjeravanja licima koja obavljaju poslove zaštite propisani su odgovarajućim članovima. U ovom dijelu je

izvršeno usklađivanje odredbi Zakona sa odredbama Zakona o agencijama za zaštitu ljudi i imovine. Zakonom je takođe propisan postupak u slučaju prestanka potrebe za daljnjim držanjem oružja i municije i u slučaju gubljenja ili krađe kao i pronalaska oružja.

#### B) Oduzimanje oružja i municije (čl. 39. do 41.)

U odredbama navedenih članova propisana je mogućnost oduzimanja registrovanog i neregistrovanog oružja i municije i postupanja sa oduzetim. Naime, nadležna policijska uprava donosi rješenje o oduzimanju oružja i municije u slučajevima koji su propisani ovim zakonom, na koje lica mogu ulagati žalbu policijskom komesaru u roku od 15 dana od dana prijema rješenja. Dalje je propisano da se protiv konačnog rješenja ne može voditi upravni spor, što je u skladu sa članom 11. Zakona o upravnim sporovima u F BiH. Navedenim članom propisano je "upravni spor se ne može voditi protiv akata donesenih u stvarima o kojima se po izričitoj odredbi zakona ne može voditi upravni spor", osim u slučajevima kad je nadležni organ pri donošenju upravnog akta prekoračio granice svoje nadležnosti ili upravni akt nije donio neposredno na osnovu ustavnih ovlaštenja.

Članom 41. propisan je postupak sa oduzetim oružjem i municijom.

#### C) Promet oružja i municije (čl. 42. do 46.)

U odredbama navedenih članova propisana su pravna lica ovlaštena za promet oružjem i municijom na malo. Naime, prometom oružja i municije mogu se baviti pravna lica kod kojih je promet oružja i municije registrovan kao jedna od djelatnosti kojom se bave uz odobrenje nadležnog organa. Dalje je propisana prodaja oružja i municije na malo, evidencije o nabavljenom i prodatom oružju i municiji, čuvanju i držanju oružja od strane pravnih lica, te propisi koji regulišu smještaj i čuvanje oružja i obaveznim evidencijama.

#### D) Popravljanje i prepravljanje oružja i municije (čl. 47. do 49.)

Zakonom su utvrđena pravila na osnovu kojih pravna lica i samostalne radnje ovlaštene, odnosno registrovane za popravlanje i prepravljanje oružja, mogu obavljati navedenu djelatnost što uključuje blagovremeno obavještanje nadležne policijske uprave o vršenju te djelatnosti, uslove koje moraju ispunjavati zaposlena lica za popravlanje i prepravljanje oružja, oružje koje može biti predmet popravljanja i prepravljanja, kao i evidencije.

#### E) Nadzor (čl. 50. do 53.)

Odredbe navedenih članova propisuju nadzor nad prodajom, držanjem i nošenjem oružja i municije, nad čuvanjem i smještajem oružja od strane pravnih lica koja se bave prometom oružja i municije, streljačkih organizacija, organizacija koje gazduju lovištem i pravnih lica i samostalnih radnji koje se bave popravljanjem i prepravljanjem oružja, kao i nadzor nad vođenjem određenih evidencija. Dalje je propisana Komisija za nadzor, unutar Ministarstva, koja će vršiti nadzor nad provođenjem Zakona. Propisano je ovlaštenje policijskom službeniku za privremeno oduzimanje oružja, municije i oružnog lista. Utvrđena je obaveza državnih organa, drugih pravnih lica i pojedinaca koji imaju registrovano oružje da omoguće Ministarstvu uzimanje otisaka oružja radi unosa otiska u propisanu evidenciju. Ova odredba je prvenstveno preventivnog karaktera, a daće značajan doprinos u provođenju istražnih aktivnosti nadležnih organa.

#### F) Kaznene odredbe (čl. 54. do 57.)

Članom 54. propisana su krivična djela:

- nabavljanje, držanje i nošenje vatrenog oružja, dijelova za vatreno oružje i municije bez potrebnog odobrenja,
- prodaja vatrenog oružja pravnom licu ili pojedincu koji nemaju odobrenje za nabavljanje te vrste oružja (novo krivično djelo) i
- davanje pištolja ili revolvera na poslugu ili davanje lovačkog oružja ili sportskog vatrenog oružja licu koje za tu vrstu oružja nema oružni list.

Navedena krivična djela imaju za cilj sankcionisati bilo kakve radnje (nabavljanje, držanje, nošenje, davanje na poslugu, prodaja) kojima neovlašteno lice može doći u kontakt sa oružjem.

Za izvršenje navedenih krivičnih djela propisana je novčana kazna ili kazna zatvora od 6 mjeseci do 2 godine.

Čl. 55. i 56. propisuju novčane kazne (u rasponu od 300,00 do 1.000,00 KM i od 500,00 do 1.500,00 KM) i zaštitne mjere (oduzimanje predmeta) za prekršaje fizičkih lica, a član 57. propisuje novčane kazne (od 5.000,00 do 15.000,00 KM) i zaštitne mjere (oduzimanje predmeta i zabrana vršenja djelatnosti) za prekršaje pravnih lica i odgovornih lica u pravnim licima.

## **ZAVRŠNI DIO**

### Prelazne odredbe

Utvrđuju koje propise donosi ministar unutrašnjih poslova Kantona Sarajevo na prijedlog policijskog komesara, postupak i rok za zamjenu oružnih listova izdatih od strane nadležnih organa u Bosni i Hercegovini po ranijem zakonodavstvu.

U cilju osiguranja principa pravne sigurnosti i poštivanja prava stečenih po osnovu prethodnog Zakona predviđena je prelazna odredba da se na registrovane imaoce dva ili više pištolja ili revolvera ne odnosi odredba člana 23. koji propisuje ograničenje.

Propisano je da se odredbe Zakona primjenjuju na pravna lica koja obavljaju poslove fizičke i tehničke zaštite, ukoliko nisu u suprotnosti sa Zakonom o agencijama za zaštitu ljudi i imovine.

### Završne odredbe

Sadržavaju odredbe o ravnopravnosti spolova, prestanku važenja ranijeg propisa, te stupanja na snagu ovog zakona.

### Potrebna finansijska sredstva

Za provođenje ovog zakona potrebno je obezbjediti dodatna finansijska sredstva u budžetu Kantona Sarajevo kako bi se na propisan način ispoštovala procedura prodaje i uništenja oružja i municije, obezbjedile naknade za rad komisija čije formiranje propisuje Zakon, kao i sistematizovanje novog radnog mjesta u Ministarstvu. Dodatna finansijska sredstva će biti u značajnoj mjeri nadomještena povećanjem takse (radi propisanog osposobljavanja) za izdavanje odobrenja za nabavljanje, držanje i nošenje oružja i municije.



**Broj: 03-07-02- 17721/07**  
**Sarajevo,27.juni 2007.godine**

MINISTARSTVO UNUTRAŠNJIH POSLOVA  
KANTONA SARAJEVO

Predmet:Mišljenje o usklađenosti nacrtu Zakona o nabavljanju , držanju i nošenju oružja i municije sa Evropskom konvencijom o zaštiti ljudskih prava i osnovnih sloboda i drugim pravnim aktima kojima je utvrđena zaštita ljudskih prava i sloboda

**U skladu sa odredbama člana 4.Zakona o ministarstvima Kantona Sarajevo («Službene novine Kantona Sarajevo», br.4/01, 13/02, 16/03 i 26/04) i člana 4.Uredbe o postupku i načinu pripremanja, izrade i dostavljanja propisa («Službene novine Kantona Sarajevo», broj 7/06-Novi prečišćeni tekst), Ministarstvo pravde i uprave razmotrilo je nacrt navedenog zakona i daje sljedeće**

## **MIŠLJENJE**

**Nacrt Zakona o nabavljanju , držanju i nošenju oružja i municije nije u suprotnosti sa Evropskom konvencijom o zaštiti ljudskih prava i osnovnih sloboda i drugim pravnim aktima kojima je utvrđena zaštita ljudskih prava i sloboda .**

DOSTAVLJENO

**1.Naslovu**  
**2.Arhiva**

MINISTAR

**Zlatko Mesić, dipl.iur.**

